

報國以掃賊安民為任至不知飲食服飾之麤潔此所謂國而忘家忠在社稷者也亦未蒙國家獎謚之典 殿下雖特垂賜物助喪之恩是豈能足慰忠魂於九泉之下歟願 殿下勅攸司追賜雲海寶吉之謚并令厚葬以報其勞以勸忠臣之志自今國葬賜謚之法雖位歷政府之臣令臺諫政府禮曹議啟施行其旅進旅退無所補益者奸慝不廉民被其害者勿使僥倖濫蒙雖非政府之臣功在社稷忠輸國家事業彰著者勅攸司舉行永為恒式下議政府擬議從一品以上禮葬贈謚正二品贈謚致賻從二品致賻其有功德而官品未應者依司憲府所申擬議取旨功臣葬謚依前例 從之○丙戌巽方有赤氣金土星相犯○上詣 太上殿獻壽 上起舞盡懽○戊子 上行別祭于仁昭殿○夜良方有赤氣○己丑徵民丁三千于忠清江原道二道各一千五百供 太上殿助成之役也期以明年正月十六日赴役○賑濟州飢遣敬承府少尹李慤以米豆一千石賑之又以米豆一千五百石市馬○庚寅 上詣 太